

Mark Drakeford AC / AM
Y Gweinidog Iechyd a Gwasanaethau Cymdeithasol
Minister for Health and Social Services



Llywodraeth Cymru
Welsh Government

Ein cyf/Our ref SF/MD/0111/15

Darren Millar AC
Cadeirydd
Y Pwyllgor Cyfrifon Cyhoeddus
Cynulliad Cenedlaethol Cymru
Bae Caerdydd
Caerdydd
CF99 1NA

29 Ionawr 2015

Annwyl Darren,

ADRODDIAD Y PWYLLGOR CYFRIFON CYHOEDDUS
GOFAL HEB EI DREFNU
DIWEDDARIAD – IONAWR 2015

Cytunais i roi diweddariad i'r Pwyllgor Cyfrifon Cyhoeddus ar yr argymhellion canlynol:-

Argymhelliad 1 – Imiwneiddio rhag Ffliw – adolygu'r targed ar gyfer imiwneiddio gweithlu'r GIG ar ddiwedd tymor 2014/15

Rydym ran o'r ffordd drwy dymor ffliw 2014/15. Disgwylir y bydd y data brechu terfynol ar gyfer y tymor ar gael ym mis Mai 2015, a bydd i'w weld yn adroddiad Iechyd Cyhoeddus Cymru yn ddiweddarach eleni.

Byddaf yn ystyried y data, ynghyd â gwybodaeth berthnasol arall gan Iechyd Cyhoeddus Cymru a'r byrddau Iechyd, cyn gynted ag y bydd ar gael, gan asesu gwerth codi'r targed ar gyfer brechu staff y GIG.

Argymhelliad 3 – Mesurau Perfformiad Gofal Heb ei Drefnu – diweddariad ar ganfyddiadau'r astudiaethau peilot sy'n cael eu cynnal yng Nghymru, gan edrych ar chwe agwedd ar y system Gofal Heb ei Drefnu

Dros y 12 mis diwethaf, mae prosiectau wedi cael eu cynnal ledled Cymru i ymchwilio i'r prosesau clinigol allweddol sy'n effeithio ar ganlyniadau cleifion ar draws gofal heb ei drefnu, law yn llaw â cheisio cynnig ffyrdd gwell o fesur profiad cleifion a pherfformiad systemau. Mae'r cynnodau peilot ar gyfer pob prosiect ac eithrio un wedi cael eu cwblhau, mae'r data yn cael ei ddadansoddi ac mae adroddiadau yn cael eu drafftio a'u rhannu gyda thimau prosiect.

Mae'r cynlluniau peilot wedi dangos bod cyfleoedd ar gael i fesur prosesau sy'n fwy clinigol berthnasol yn y llwybr gofal heb ei drefnu, disgrifio'n well rai o'r ymyriadau clinigol allweddol, a phwysigrwydd mesur o 'achos' i 'driniaeth' neu 'ganlyniad terfynol'. Mae'r camau nesaf yn cael eu hystyried.

Argymhelliad 15 – GIG 111 – rhoi diweddariad ar GIG 111

Mae bwrdd gweithredu prosiect amlasiantaeth 111 wedi cael ei sefydlu, o dan gadeiryddiaeth prif weithredwr bwrdd iechyd, gyda chyfarwyddwr prosiect o'r GIG ac uwch swyddog cyfrifol o Lywodraeth Cymru. Cefnogir y prosiect gan dîm penodedig o GIG Cymru. Mae'r prif weithredwyr wedi cytuno i ryddhau adnoddau o'u sefydliadau i gynnig yr holl gymorth sydd ei angen.


Rwyf wedi datgan yn glir o hyd bod yn rhaid manteisio ar brofiad o fannau eraill er mwyn gweithredu yng Nghymru. Mae honiadau helaeth – er yn destun anghydfod – wedi codi bod y system 111 wedi gwaethygu'r pwysau ar ofal heb ei drefnu yn Lloegr dros y gaeaf, yn hytrach na'u lleddf. Rwyf felly wedi gofyn i'r bwrdd gweithredu fy nghynghori ar sut gellid bwrw ymlaen â chynllun peilot i roi ar brawf y camau y mae angen i ni eu cymryd, gan gyfyngu ar unrhyw sgil-ffeithiau anfwriadol wrth fynd i'r gaeaf nesaf. Os bydd y cyfnod peilot yn gwrthsefyll y broses graffu, cytunwyd y bydd y gwasanaeth 111 yn cael ei gyflwyno'n raddol yn ddaearyddol. Bydd hyn yn caniatáu dysgu o gamau gweithredu, lle caiff gwersi o un cam eu defnyddio yn y cyfnod nesaf, sy'n caniatáu datrys materion a sgil-ffeithiau anfwriadol cyn cyflwyno'r gwasanaeth ymhellach. Bydd hyn yn sicrhau bod ansawdd, diogelwch a phrofiad cleifion yn gwella'n barhaus. Bwriedir ar hyn o bryd i'r cam cyntaf gychwyn ym mis Hydref 2015 yn ardal Bwrdd Iechyd Prifysgol Abertawe Bro Morgannwg. Caiff ei werthuso'n drylwyr drwy gydol gwanwyn 2016 i ddylanwadu ar benderfyniadau ynghylch amseru'r cam nesaf. Os bydd y gwerthusiad yn gadarnhaol, bwriedir cwblhau'r broses o gyflwyno'r gwasanaeth 111 ledled Cymru yn ystod 2016/17.

Mae pob bwrdd iechyd yn gwneud gwaith i ddeall anghenion iechyd eu poblogaeth fel rhan o'r broses barhaus o ddatblygu eu cynlluniau tymor canolig integredig. Gofynnwyd iddynt sicrhau bod llwybrau a gwasanaethau lleol amgen ar gael mewn gofal sylfaenol a chymunedol i'r gwasanaeth 111 cenedlaethol gysylltu â nhw; mae'r cyswllt hwn rhwng yr elfen genedlaethol a'r elfen leol yn rhan annatod o wasanaeth 111 llwyddiannus.

Mae byrddau iechyd hefyd yn gyfrifol am gyfathrebu ac ymgysylltu lleol, a bydd hyn hefyd yn dylanwadu ar ddatblygiad eu gwasanaethau lleol. Datblygwyd cynllun cyfathrebu ac ymgysylltu cenedlaethol i sicrhau bod gweithgareddau'n cael eu cydgyssylltu a'u bod yn gyson, ac mae Bwrdd y Cynghorau Iechyd Cymuned yn cymryd rhan lawn yn y broses.

Byddaf yn ystyried pa sefydliad a fydd yn gyfrifol am y gwasanaeth 111 yng Nghymru dros y misoedd nesaf ac yn eich hysbysu am ddatblygiadau pellach.

Dymuniadau gorau



Mark Drakeford AC/AM

Y Gweinidog Iechyd a Gwasanaethau Cymdeithasol
Minister for Health and Social Services